

嘉靖乙未春淨峯張公被天子命牧守于廉
越戊戌冬以漕憲提學陞秩去廉之日攀戀
無老幼甚弗爲情旣去之閱月爲明年己亥
人心思公之德如慕父母士思于學農思于
野賈思于市旅思于途候公而執役莫不藉
藉喃喃翕然同情也鄉父老里民黃給等衆
詢僉同及需材構亭制碑孔飭將以識公遺
愛而寓去思工旣竣命鐸記之鐸義以成之
敢以衰蕪不文辭耶乃遡而言曰廉極荒瀕

海土瘠民貧益以賦役繁苛珠池厲梗況至
正德間百治傾頽公私玩愒物產民生彫瘵
甚矣幸惟聖皇御極憫念元元爰命我公作
民師帥自蒞郡來不立異不假術不植私正
已馭吏篤道愛民凡賦役正輸悉經條正里
甲科辦務從寬減與夫苛條積蠹昔以厲於
民者咸汰之每公暇則循閱鄉野勸諭農植
凡地之廣衍可田者令民濬川瀦水溉之闢
之自陳調以及諸鄉民得就業者不啻萬計

農獲其利碑而祠之時郡邑學治湫隘逼城
公相山川王氣聚材鳩工改建二學規制巍
然故士風文科駸駸向盛又各市地入官租
重商弗集佃民告艱乃爲狀請輕之故商貨
始通而民利焉驛路自木港抵烏家道里遼
曠行者苦於剝刦乃相丹竹江爲四塞地創
建營堡設兵守之行旅稱便海民盜珠沒風
波殯刑獄公大惻然乃設爲厲禁使民不敢
犯繇是多所全活歲丁酉議征交南公大懼

殃民力陳其不可將來民命不至於困斃者
未必非公之賜也至若優老恤貧疏冤釋滯
綏強撫弱又公之深仁厚澤的的在人者可
勝悉哉夫公之功福廉之功也公之愛惠民
之愛也功昭海宇而愛洽人心則夫去後之
思自有不容泯者碑而識之宜也非譽也鐸
嘗聞公之功也未暇論跡其建學校闢農田
百世之功無窮之愛也昔文翁興學于西蜀
而士延其化召父開溝瀆于南陽而民戴其

思今公於二賢實兼之矣豈惟今日思之異
世之下必有賢其賢而利其利而與思擊嘆
者乎故特著之以告夫職史者公諱岳字維
喬別號淨峯福建惠安人發解中丁丑進士
器識宏遠而節不可撓度量恢廓而才足以
弘濟艱大文章溫雅如黃鐘大呂構有餘音
台輔器也他日柱石朝廷霖雨四海功將銘
鼎彝而垂史籍矣何區區吾廉之足云銘曰
巍巍名公雄才偉器一代儒宗兩儀間氣煌

煌虎節來宣來旬政罔違道清不爲名建學
育才金無躍冶闢田裕農粟彌原野掾無假
法民不茹冤市肆有繹旅途以恬枯鮓是甦
積蠹是殄名重交彝風清海甸人攀去轂鵲
擁行車漫漫棠愛悠悠我思公以兵部侍郎
都御史總制川貴謚惠襄

郡侯游公祠記

何玉成

古今建祠以銘守若令功德者不勝縷指唯
畏壘之尸祝峴首之龜龍世世猷稱焉則以

不朽在人心非俎豆碑碣之能爲不朽也又
况奕世相承重熙累洽益闡揚而光大之如
廉郡守游太翁之爲祠者哉翁諱日章號東
荆乃今叅知公之先大人也翁以福莆望族
岐嶷秀挺苞孕沉涵守峻而才達外質而中
惠博綜墳索嫻古文辭著有四書釋義書經
釋義三餘集百餘卷行于世以嘉靖之己未
年成進士由臨川令晉比部郎敷歷中外咸
卓鑠有聲至萬曆之乙亥年聖天子塵東顧

憂以廉爲海邦重地非其人弗靖也乃特簡
往蒞茲土廉故僻處陬澁景物蕭索人文黷
習謠俗椎俚野多鴻鴈之哀時有萑苻之嘯
公勞心撫綏百計救寧首舉文翁化蜀之法
自公多暇輒拄笏環橋集博士弟子員揚榘
今古剖析疑義徹昕夕不倦刊示家禮傳播
民間一時人士咸彬彬質有其文是歲大祲
夏四月不雨原田龜析民莫必其命公步禱
三日大雨如注一切菲躬縮腹與民同甘苦

禁訟清刑寬徭薄斂嘉與民休息每題其柱
曰天牧有心畱寸土良民何事入公門仁人
之情見乎辭矣先是監司多執法民苦斃杖
下者諸長吏噤不能請公遑遑正色庭爭所
全活人無數永濟橋災工浩而財訕不能更
舉民多病涉公慨然捐俸薪購木石砌梁十
四道醺水爲十三空以行至今屹然長虹行
者以爲途居者以爲市尤稱無量功德也他
如持已之介率屬之端馭下之嚴恤民之周

未可殫述不筌楚而稅不逋不鈎棘而情無
覆不破柱而青幘白茅之雄匿影以遁不察
淵而舞文弄智之猾抱牘而驚太和翔洽風
物改觀廉之父老子弟睢睢于于正嬉遊於
光天化日之中而未有極云何而天不憖遺
也易簣之後簡其囊唯餘半載俸尚不足贍
輿櫬一時士民如喪考妣嘔吟不已乃相謀
而尸祝之此祠之所由作也是時叅知大人
甫九歲問業於廉郡署中逾四十年而儼然